

Integralni tekst¹

ZAKON O PROVOĐENJU ODLUKA KOMISIJE ZA ZAŠTITU NACIONALNIH SPOMENIKA USPOSTAVLJENE PREMA ANEKSU 8. OPĆEG OKVIRNOG SPORAZUMA ZA MIR U BOSNI I HERCEGOVINI

I – OPĆE ODREDBE

Član 1.

Ovim zakonom utvrđuju se mjere zaštite i rehabilitacije dobara koja su utvrđena kao nacionalni spomenici Bosne i Hercegovine odlukom Komisije za zaštitu nacionalnih spomenika, uspostavljene u skladu sa Aneksom 8. Općeg okvirnog sporazuma za mir u Bosni i Hercegovini (u daljem tekstu: Komisija).

Odredbe drugih zakona i propisa neće se primjenjivati ako su u suprotnosti sa ovim zakonom.

Član 2.

Pojašnjenje izraza u ovom zakonu:

“Nacionalni spomenik“ je dobro koje je Komisija proglasila nacionalnim spomenikom u skladu sa čl. V i VI Aneksa 8. Općeg okvirnog sporazuma za mir u Bosni i Hercegovini (u daljem tekstu: Aneks 8), kao i dobra upisana na priloženu Privremenu listu nacionalnih spomenika, sve dok Komisija ne donese konačnu odluku o njihovom statusu, a za što ne postoji vremensko ograničenje i bez obzira na to da li je za dotično dobro podnesen zahtjev

Rehabilitacija nacionalnih spomenika Bosne i Hercegovine, u smislu ovog zakona je vraćanje oštećenog ili uništenog dobra u stanje u kojem je to dobro bilo prije njegovog uništenja, kao i ponovna izgradnja (obnova) nacionalnog spomenika na istom mjestu, u istom obliku, u istim dimenzijama i od istog ili istovrsnog materijala kao što je bio prije rušenja uz, u mjeri u kojoj je to moguće, korištenje iste tehnologije građenja.

II – ZAŠTITA NACIONALNIH SPOMENIKA

Član 3.

Nacionalni spomenici uživaju najviši stepen pravne zaštite utvrđene posebnim zakonima u Federaciji Bosne i Hercegovine (u daljem tekstu: Federacija).

¹ Ovaj integralni tekst sadrži tekst Zakona i sve njegove izmjene i dopune (“Službene novine FBiH”, br. 2/02, 8/02-Visoki predstavnik za BiH, 27/02, 6/04 i 51/07). Integralni tekst se koristi samo za internu upotrebu i na njega se ne može pozivati prilikom službene upotrebe.

Član 4.

Svako, a posebno nadležna tijela Federacije, kantona i gradske i općinske službe suzdržat će se od bilo kakvih radnji koje mogu oštetiti nacionalne spomenike ili dovesti u pitanje njihovu zaštitu i rehabilitaciju.

III – ODOBRENJA ZA ZAŠTITU, KONZERVACIJU I OBNOVU NACIONALNIH SPOMENIKA

Član 5.

Odobrenja za zaštitu, konzervaciju, prezentaciju i rehabilitaciju nacionalnih spomenika na prostoru u granicama nacionalnog spomenika koje su utvrđene odlukom Komisije izdaje Federalno ministarstvo prostornog uređenja (u daljem tekstu: Ministarstvo), u skladu sa odredbama Zakona o prostornom planiranju i korištenju zemljišta na nivou Federacije Bosne i Hercegovine ("Službene novine Federacije BiH", broj 2/06 – u daljnjem tekstu: Zakon).

Odobrenja iz stava 1. ovog člana Ministarstvo izdaje na područjima upisanim na Privremenu listu nacionalnih spomenika, a u granicama koje kao privremene odlukom utvrdi Komisija.

Nadležna tijela za odobravanje građenja van granica nacionalnih spomenika utvrđenih odlukom Komisije, odnosno van privremenih granica iz stava 2. ovog člana, kao i provođenje mjera zaštite u zaštitnim zonama i područjima koja graniče sa nacionalnim spomenikom utvrđuju se kantonalnim zakonima.

Član 6.

Za rehabilitaciju nacionalnih spomenika prije izdavanja odobrenja Ministarstvo je dužno za projekt rehabilitacije prethodno pribaviti stručno mišljenje nadležne institucije za zaštitu kulturno-historijskog naslijeđa.

Za rehabilitaciju potpuno uništenih nacionalnih spomenika za koje ne postoji dokumentacija, prije izrade projektne dokumentacije Ministarstvo je dužno prethodno pribaviti stručno mišljenje i podloge nadležne institucije za zaštitu kulturno-historijskog naslijeđa.

Član 7.

Pod uvjetima da su ispunjeni kriteriji 2. (2), 6. i 7. (1) ovog zakona, Ministarstvo izdaje potrebne dozvole za rehabilitaciju nacionalnih spomenika u roku od 30 dana od podnošenja zahtjeva.

Član 8.

U postupku izdavanja odobrenja iz člana 5. st. 1. i 2. ovog zakona primjenjuju se propisi o upravnom postupku, ukoliko odredbama ovog zakona nije drugačije propisano.

Protiv rješenja Ministarstva donesenog u postupku izdavanja odobrenja iz člana 5. ovog zakona ne može se izjaviti žalba.

Protiv rješenja iz stava 2. ovog člana može se pokrenuti upravni spor tužbom kod nadležnog suda u roku od 30 dana od dana prijema rješenja.
Rješenja donesena suprotno odredbama ovog zakona ništavna su.

IV – OBAVEZE PREMA ANEKSU 8.

Član 9.

Federacija je dužna osigurati pravne, naučne, tehničke, administrativne i finansijske mjere za zaštitu, konzervaciju, prezentaciju i rehabilitaciju nacionalnih spomenika.

Ministarstvo provodi mjere iz stava 1. ovog člana.

V – OBAVEZNA SARADNJA

Član 10.

Službenici tijela uprave i institucija Federacije, kantona, grada i općina dužni su sarađivati sa Komisijom.

Službenici tijela uprave i institucija Federacije, kantona, grada i općina dužni su sarađivati sa Ministarstvom i na zahtjev Ministarstva dostavljati mu svu relevantnu dokumentaciju vezanu za nacionalne spomenike.

Član 11.

Kantonalna tijela uprave i gradske i općinske službe dužne su u roku od 15 dana od dana stupanja na snagu ovog zakona Ministarstvu dostaviti sve zahtjeve sa pripadajućom dokumentacijom koji su u postupku, a odnose se na odobrenje iz člana 5. ovog zakona.

VI – NADZOR

Član 12.

Nadzor nad provođenjem ovog zakona i propisa donesenih na osnovi ovog zakona obavlja nadležna uprava za inspekcijske poslove.

Član 13.

Inspekcijski nadzor nad odredbama ovog zakona vodi se po odredbama o inspekcijskom nadzoru utvrđenim Zakonom.

VII – PRIJELAZNE I ZAVRŠNE ODREDBE

Član 14.

Ako je upravni postupak za izdavanje odobrenja za rehabilitaciju pokrenut pred nadležnim tijelom do dana stupanja na snagu ovog zakona, a do tog dana nije doneseno prvostepeno rješenje, ili je rješenje prije toga bilo

poništeno i vraćeno prvostepenom tijelu na ponovni postupak, postupak će se nastaviti po odredbama ovog zakona.

To ni u kom slučaju ne usporava izdavanje dozvole za rehabilitaciju niti neku mjeru koja se poduzima u skladu sa tom dozvolom, ni neku drugu radnju koja se poduzima u skladu sa ovim zakonom ili Aneksom 8.

Član 15.

Sadržaj dokumenata prostornog uređenja suprotan odredbama ovog zakona neće se primjenjivati na zaštićeni prostor nacionalnih spomenika.

Član 16.

Sva nadležna tijela i pojedinci koji postupaju po ovlaštenju nadležnih tijela dužni su zaštititi dobra za koja je podnesena molba Komisiji da se proglašavaju za nacionalne spomenike u periodu od godinu dana od dana podnošenja molbe Komisiji ili do donošenja konačne odluke Komisije u skladu sa Aneksom 8, od poduzimanja mjera koje mogu oštetiti ta dobra.

Član 17.

Ovaj zakon stupa na snagu narednog dana od dana objavljivanja u "Službenim novinama Federacije BiH".